

ANA ITERANIBA AONON TE BETEBEKE

RONGORONGO NI KAIRIIRI MAN TE AONO

N na Riki Bwa Am Taura

Unimwaane O. Vincent Haleck

Te Beretitenti n te aono

Etabeiainga n tainako te Uea irouia Ana toro ao e a tia ni karaoa ana motinnano nakoia. E karaoi motinnano aikai rinanon Berita.

Nakon Iotua e tua te Uea, “... aroungke I memena iroun Mote, ao ai arounaba ni memena I roum: N na bon aki kakiko, ao N na bon aki kitaniko. Kona korakora ma n ninikoria.”

Nakoia ana utu Riaai ngke a mwananga nakon te aba ni Berita, te Uea e tua, “Ao N na riki naba bwa am taura i nanon te rereua . . . kam na ataia bwa kam kairaki irou.”

Ni bong aikai n Aanon te Betebeketiai Riaai ao Iotua ake a tia n uringatamaroan te Uea ao kakabwaia ni maiuia n taai akekei ao ngkai. E taekinaki bwa “te ururing bon kanikinaean te kakaitau”. Rinanon nako ara Aono ti a tia ni kaoia taanga ni mitinare aika kaara bwa a na roko ni beku ni mwakoron nako te Betebeketia n tabo ake a tabe n rikirake iai te Ekaretia. Irouia naake a tia ni beku ao a teimatoa ni beku, bon aroia ni manga anganakoia naake a tibwa rairaki nakon te Ekaretia. Taanga aika mitinare bon oin te Ekaretia are e a kaman waakinaki mai i mwaina n ririki aika a bwakanako, ngke mitinare mai Amerika a roko n reireiniia aia bakatibu ake a butimwaea te euangkerio. Nakanne ngaia taan moan rairaki, n te moantai a aki rang taneiai ma aia aro ae boou, n ai aroia naba membwa ake a tibwa kaina te Ekaretia n tabo ake e a tibwa tabe n rikirake iai te Ekaretia. N te tai aei ti weteia taanga ni mitinare

ni boong aikai man katabwenaan te Ekaretia bwa a na roko ni buoka kakorakoraia tarria ao mwaneia ni karikirakea te Ekaretia. Ni koauana, a “riki bwa taura”. Tamnein te Uea e na kakoaua rinanon aia banna ni katooto, bwa man ana kairi te Uea are a kairaki iai. Ara taanga ni mitinare a buokiia ao a kaota nakoia aron karaoan ao maiuakinan reirein te euangkerio inanon maiuia.

Mitinare aika taanga a karekea te bitaki ngkai a kaoti aia namakin ao a reireiniia membwa n te Ekaretia ma rikirakeia n aron kairan te Taromauri, ao aron karaoan nanon te euangkerio

inanon maiuia ni katoa bong. Iai katei nako aika a kakaokoro irovia aomata n tabo aika Papua New Guinea, Toromon, Vanuatu, Mwatiare ao Kiribati. Ara taanga ake a beku a roko mai Samoa ao Tonga, ai aroia naba kain Samoa ao Tonga ake a maeka I Amerika, Nutiran ao Aotiteria. Iai naba tarira mai Papua New Guinea, ma buuna ake a beku.

Iangoa aia koaua taanga ake a tia ni beku, ke n tiku ni beku:

“Ara mition ae uoua rirkina n aban Toromon bon te kabanea n tamaroa are ti a tia ni karekea inanon maiura . . . are e a tia ni buokiia ni karekea



Tari Viiga ao Titita Lupe Fuimaono



Tari Lameese ao Titita Loreta Taala

kamatoakin ara koaua . . . n ota n ana tangira Tamara are I Karawa ao ara Tia Kamaiu ibukira, ao ni kabane Natina. Ti a tia n namakina te kamarurungaki ao te kakorakoraaki ao 'n nakonako ao n aki bwaka'. Ti kokoauai kakai ao

bain te Uea inanon maiura ma aika a Itiaki n rikiraken te mwakuri". —*Tari Viiga ao Titita Lupe Fuimaono, Pesega Samoa Titeiki*

"Ibukin ririki aika a bat, I beku iaan aia kairiiri Titeiki Beretitenti

aika a kakaokoro bwa te kiraaka n te Titeiki. Atatai ao taneiai ake I karekei, a tia ni katauraoai ni beku ao n ibuobuoki bwa te Nakoanibonga ao te tia kairiiri ni botaki n te Daru Papua New Guinea Titeiki. Ti iangoa aei bwa te kakabwaia. Te beku ibukin te Uea ma toau n akea tokina Titita Taala, bon te kakabwaia n tainako". —*Tari Lameese ao Titita Loreta Taala, Pago Pago Samoa Maeao Titeiki*

"Ara mwakuri ni ibuobuoki i Papua New Guinea e rang n nano iroura, riki ibukin te Tari Jackson, ae bon kain te aba. Ara beku ti tangiria riki n okira PNG n tataekina ana euangkerio are e kaokaki iroun Iesu Kristo nakoia ara utu ao ara aomata. Kabonganaakin arara are ti uouotia n tainako ni katoa bong e anganiira te korakora ae rianako n te Onimaki ao te kantaninga. . ." —*Tari Peter ao Titita Serena Jackson, Eight Mile Plains Titeiki Aotiteria*

"Kam rabwa ibukin karokoia taanga aika rang kakateke bwa a na beku ikai i PNG. E rang korakora aia ibuobuoki ibukin karikirakean te Ekaretia ao kakorakoraia membwa ikai. A beku bwa taan kairiiri, kaunganano, taan kataneiai ao taan Reirei n aia Mwaanga ao n aia uoote. A buokiia naba ara Mitinare n buokiia aika tiaki membwa ao aika membwa aika aki kakaonimaki n kaokiia nakon waaki ni kakukurei aika a bwanin. N tokina, I a noora te rikirake ni mwaitia aika a ira te bootaki n toa. Tititati a ibuobuoki n te Moanrinan, Kairake n Ataeinnaine ao Bootaki n Aine, ni Kakorakoraia bootaki akanne". —*Mition Beretitenti Finau Hafoka, Papua New Guinea Port Moresby Mition*



Tari Peter ao Titita Serena Jackson



Mition Beretitenti Finau Hafoka

N aia beku, ara mitinare aika taanga a katea te Ekaretia. Bon ngaiia taan ibuobuoki rinanon te Uea ae a uota otan Ana euangkerio nakoia aomata ao te aba. A unikaki koraa inanon nano ao Iango aika

tauraoi ni karekei. Ana berita te Uea bon te kakoaua, "E na mena i angataimi ao n angamaingimi, ao Tamneina e na mena inanomi, ao Ana anera a mena i buakomi, n tabeki ngkami rake." ■

ANA ITERANIBA TE AONO

Tibwauaan Rabakauna n te Riki n Toronibwai

Iroun Tessa Dewsbury

Engae ngke e kaikawaaki n te Katorika, Kabuua e kaina te Aro ae te Boretetanti ma iroun buuna ngke e mare. Imwiina—inanon 11 te riki e kaitibo ma kain te aro ae te Koaua, ma e ataia inanona bwa iai te bwai ae kakaawaki ae bua.

N te taina e kaitibo ma mitinare n te LDS (Aika Itiaki ni Boong aika Kaitira) n rianna n te kawai. E kateia ao e kaoia mitinare mwaane bwa a na roko ni kawaria bwa e na ongora

taekan aia Ekaretia. E kaonaki n te rau ngke e a ataia bwa ngaia iai te bwai ae e a tia ni bua man maiuna n tamnei . . . bon bwanin ana euangkerio Iesu Kristo—ao ngkai e a reke irouna!



Kabuua e bwabetitoaki bwa te membwa ngaia n Ana Ekaretia Iesu Kristo ibukiia Aika Itiaki ni Boong aika Kaitira inanon 2000. E tangiria ni kabane natina bwa a na kaina te Ekaretia; ni kukureina ae batia . . . a bane ni kainna!

Kabuua bon te aine ae korakora ana Onimaki ao e nanomatoa. Ibukin kangaanga ake a roko man te Aoraki ae te tioka, Kabuua e koreaki waena ma e bon aki katokia man ana waaki ni karaoi bitineti aika uoua ao karaaoan nakoana n te Ekaretia—E roko n tabo nako ma okona.

E ngae ngke e mate buuna uoua te ririki n nako, e namakina bwa e rang kakabwaiaki irouia natina niiman aika a ikawai ake a tararuia. E namakina te kakabwai bwa e teimatoa ni kona ni kuukana kanana ni mweengana ao n tabetai e katauraoi amwarake aika a onoti man te mai, are e kabonakoa n angiin te tai.

Kabuua e reke ana tai n ira te kiraati n te riki n Toronibwai are e kairaki man te Ekaretia iaon aron moan waakinan ao karaaoan te bitineti ae uarereke. N tekeraoina, e kakabwaiaki bwa iai mwakoron abana ae mena irarikin te kawai iaon Tarawa are e tei iai ana bitineti n iteran te kawai. E moan waakina kateana inanon 2009. Teuana bon te titoa ae uarereke are irarikin te kawai. Are teuana kanga ai aron te tabo ae uarereke are ana taan bobwai, aika mwaane ao aine, a roko



mai iaon aba, n uotii bwaai ni Kiribati ake a karaoi ao amwarake nakoina bwa e na karbonakoi—Kabuaa e kara-kai booia ao e karekea ana raka ngkai a kaboaki bwaai akanne.

E ngae ngke e rotaki n te bubu ni katobibia te titoa ake a mena iai te bwai ni Kiribati, e bon teimatoa n taebubuaki bwa ana akea te bareka. Bwaai ake a karbonakoaki e butimwaa ni karinii ni kabane ni moa man waa aika uarereke ao te Uu ibukin rawean te rabono taian tibuta aika a matamata aika a toka mataia ao—ai bwaai ni katamaroa aika a karoaki man te buuroo. Aika a kaboaki naba, bon te beneka ae karoaki man te karewe ae manging—te karewe ae manging ae nneaki n te bwatoro are e kaitiakaki ao e manga kaboakinako are a kabongana kain te aba ni kamraa iai aia ika.

Boon bwaai a kauarerekeaki n te kabanea ni booraoi; bon tii temanna te tia mwakuri, te manatia n te titoa, ngkai Kabuaa are ngaia ae tararua ana KAB.T Bwain Kiribati titoa. Iai te raitinti n te bitineti ae kabwakaaki ao boon te iti.

Kabuaa e iangoia bwa bon te kakabwaia ae tamaraoa te riki n Toronibwai, ao n aron Beretitenti Thomas S. Monson, e nang kukurei n tibwaia ma tabeman, bwai ake e reiakinii.

Ngkai e beku bwa te beretitenti n te Bootaki n Aine e kaitibo n tainako ma aine aika e aki tau aia mwane ke akea aia mwane ake a na kabooi aia bwaai aika a kainnanoi n maiuia. E kakamwakuri ni kaungaiia aine n te Bootaki n Aine bwa a na irii kooti n te riki n Toronibwai are e a tia n iria. E taetae naba nakoia aika tiaki membwa n te komiunitii ao e kaoia aine bwa

a na roko ni kaina te kiraati n te LDS riki n Toronibwai. Angiina a bon rang ni mama n te moan tai, ao a mama n ira te kooti, ma e kaungai nanoia Kabua ao ni buokiia bwa ana tokanikai iaon mamaaia ao ni boong aikai a mwaiti aine aika a karekemwane ni buokiia ao ni boutokaiia aia utu.

Kabuaa bon kain Teaoraereke 2nd Uoote. ■

Te Tia Wae Kunnikai i Tarawa

Iroun Tessa Dewsbury

Merea Henry e karaoi tibwangana n tararuuaia ana utu ma te nanomatoa. E kabonganai ana tarena aika a mwaiti ni buoka buuna, Aboro, are e mwakuri n te onaoraki n te aono, ni katauraoi bwaai ibukiia aia utu n te maiu n Rabwata ao n Tamnei, are e raonaki ni mwananga aika uoua nakon te Tembora ni katoa ririki. Aio bon te mwakuri ae korakora ngkai te kabanea ni kaan n Tembora e mena I Biiti.

Merea e rang kinaaki irouia kain te tabo ibukin rabakauna ni wae kunnikai. Ana karaobwai a tia ni kaboakinako n taabo aika New Zealand, Australia, ao Kiritimati—are bon mwakoron Kiribati.

I kaitibo ma Merea ni mweengana i Tarawa ao n te tabo are e waewae iai n te ruu ae bubura inanon ana auti. I reiakinna bwa e karoa naba te timaking iaon ana kunnikai are e karaoi ni baina! E tatangria ni kairia ma te korooti ao ni moromoronna ni katamaroa ni buokiia bwa e na tara n onoti.


Imwiin kaitiakan raoi ana auti ao barongaakina raoi ni katoa ingabong, e tekateka n ana mitiin n itutu ni karoa tabena ni kabwanina ana bong. Ao e rang kakaonimaki ni boutoka te bitineti ibukiia kain te tabo iaon Tarawa n tabo ake e kabooi iai ana kunnikai ao ana karai.



Ngkai te tina Merea e kakoaua te Reirei ae tamaroa ao e namakina te kakabwaiaki ngkai e a tia n Reirei n te Moroni High School n te tabo are a Reirei naba iai natina aika niiman; natina aika uoman a waaki nako

ni karikirakea rabakauia iaon aia waewae.

E kakanonga n ana onaroka ni kain amwarake ibukiia ana utu naba. E bon rang ni kangaanga unikan kai n amwarake i Kiribati ibukina bwa




te tano e aki rang nakoraoi—bon tii tanon te bikebike. Ma, e teimatoa n unika arokana n tamaroan are e kona ao e tatangiria ni kang amwarake aika a boou; ana kaabiti a bon rang ni maiuraoi.

Te ran i Kiribati e aki mano nima-kina man te taebu ao kain te tabo a tia n reireinaki bwa a nnei nimaia inanon bwatoro buraeitiki ao a katikui iaan te riringa ibukin teuana ke uoua te bong, riki iaon kaabwan aia auti, ni buoka tiringan man aoraki aika urubwai. Kiribati e kabuehue, e aomwaimwai ao kanoan te bong e bibitaki man 1° man kanoan te bong teuana nakon are imwiina.

E taku Merea: “I reireiniai natiu bwa e raoiroi karekean te reirei ae tamaroa, ma a riai naba n nako ni mitinare.” E nako New Zealand ni karekea ana kataneiai ni mitinare n te MTC (Tabo ni Kataneiai ibukiia Mitinare) imwain okina nako Kiribati ni beku bwa te mitinare ibukin te Ekaretia.

Merea e aki tii tararuia ana utu rinanon te riki n Toronibwai ao e mwakuri korakora, ma e katea naba te banna ni katooto ibukiia natina ao tititati ake tabeman n ana uoote. ■



Uniki kainamwarake n te Ran

Iroun Tessa Dewsbury

E rang n tatabetabe maiun Eritai Kateibwi are e maeka iaon Tarawa, Kiribati. Ma buokana ae e nang uare-reke mairouia raraona e nang tatabetabe n ana kambwana are e tabe ma unikan kain amwarake n te ran.

Ngke e kamatebwia te bitineti n te BYU-Hawaii e reke ana iango bwa e na buokia iai ana aomata ni mweenngana ni karikirakean amwarake aika a kai maiu ao n nakoraoi ni kabongana-kin te ran ae kabongana te oxygen ao te amwarake nakon kai n amwarake n aki keniken ke ni kena aontano.

Ngkai ataein te Reirei n te BYU-Hawaii, Eritai e kairaki nakon te SWATT

(Sustainable World Action Technology Team). E ira te wekitiaobu ao inanon 2016 e moanna n “Iango aika Tamaroa” te kabo iaon te bitineti n te BYU-Hawaii Willis Tienta—kaniwangana bon \$3000.

E nako China Eritai ni karekei bwaai ni mwakuri ao bwaai nako ibukin katean iunite n ununiki n te ran are e ikoikoti. E kangaanga karekean te bwam ae tau ao e kawarri tebwi ma ouua taabo ni bobwai; n tokina e kunea te bwai are e bon kainnanoia. Te bwam ae maiu man korakoran taai ae uarereke are e kaburoburoa te ran inanon te boora

are nnen te aroka are a katukaki iai (kamwarakeaki?). Teimotoan mwaitin te oxygen e kakoaua bwa waakan aroka nako a tiku ni maiuraoi. N riki-rakem man te kabwebwe, te raoki meron ae ea matoa e kona n anaaki uaana tii inanon 30 te bong.

Teuana te kakabwaia ae korakora man te aekaki n “ununiki” aei bwa e rang uarereke te tabo are mena iai—ao akea te tano naba teutana. Te kangaanga iai bwa e kainnanoa te mwaiti n ran, are te kabanea n tamaroa i Kiribati—ma, Eritai, n aroia kain te tabo aika mwaiti, e kabongana ranin ana mwaniibwa. E kawawaea naba ana karau are e bwaro nakon te tangke man te kai ni kawawa man ana auti.

E a tia Eritai ni kaoaki bwa e na tibwa ana tititem n ununiki n te ran ao rabakauna n te wekitiaobu are e karoaki n ana tabo te Ekaretia “Te Reirei n Onaroka”. Ana Iango a rang butimwaeaki, ao kain te tabo a maro-roakina te kawai ae boou ni karekean te amwarake ma te ingaingannano.

Te nutibebwa are e katerea kina-kin Eritai bwa te Tiambion ni Kairake n te Aonaaba ae tokanikai, are bon te burokuraem ibukin te enuwaromena are e boutokaaki man Bootakin Aba. Eritai e reke irouna te tokanikai n Tebetebekai mai Atia—are bon te kamoamoa ae korakora ibukina bwa Eritai e kinaaki ibuakon karinrin aika rianako inanon 2017.

Eritai ao buuna Tebaraoi a uaia n nako ni mitinare: teuiae i Hawaii, ao neiei i St. George, Utah. A kaitibo ngke a kaai n reirei n te Moronaai High School i Kiribati. Imwiina a manga kaitibo riki i Hawaii ngke a uaia n Reirei—a mare n 27 Nobembwa 2014. ■



E a tia Eritai Kateibwi ni kaoaki bwa e na tibwa ana tititem n ununiki n te ran ao rabakauna n te wekitiaobu are e karoaki n ana tabo te Ekaretia “Te Reirei n Onaroka”.

Teuana-imwiin-Teuana

Iroun Tessa Dewsbury

Teuana imwiin teuana Taabia Kabaua e katoai aroka n tebokii inanon ana onnaroka—akea te ooti ke te raanga n ran ae karoaki; e kakoaua raoi bwa ni kabane aroka nako a karekeia te ran are a kainnanoia bwa ana rikirake. Buuna Temwarin e aki toki n buokiia n itiia te ran man aia mwanibwa ao e uotia nakon te onaroka inanon te bwaketi ae bubura ae te buraeitiki—karoana ni kabane e bon rang ni matoatoa.

Akea te ununiki ae bwainaki i Kiribati—bon akea te aba ae tauraoi ibukina ao te aba bon anon te bikebike—are e bon aki tau ibukin kamaiuan aroka ibukin uaanikai ao bukinikai. E ngae ngke amwarake aika boou a uotaki iaon kaibuke, bwaai n aron irikomaiu ao kai n amwarake a kona ni kangaanga rokoia ao n tabetai a bane imwain manga rokon te kaibuke.

Tabeman kain te tabo a uniki kainamwarake aika kain amwarake ni buoka kamwarakeaia aia utu ma tabeman a uniki aika a bon tau ni kabooi nakoia kain te kaawa ake tabeman. Taabia Kabaua e kabooi tabeua ana uaanikai, n ikotaki ma turee ni kabwebwe, man te kiakia ae uarereke, are e katokaaki iaon ana tabo n ana onaroka are e kaitara mwain te kawai. Te tai ni bobwai n te moaningabong ao e toki n te tairiki—tain te aba.

E kararoaia kamea ake aiwa ao ataei ake a takakaro man arokana ni katea ana oo man te karaun are e a tia ni kabonganaki. Rabwan te kaa ake a aki kabonganaki bwa ana bwai n

ununiki—ngkana ko maeka n te atimwakoro ae tionako, ko kabonganai bwaai nako ake a tauraoi ake a kona n reke.

Ana onaroka Taabia e aki rang bubura n aia kainibaire kain tinaniku, ma e nakoraoi ibukin unikakin kabiti, tibiniti, bwaukin, tomato, raoki meron, ao uoota meron ao bwaingan.

Taabia ao Temwarin bon kaaro irouia natia aika 11—ngaia are a taneiai ni mwakuri korakora. irarikin ao i tinanikun aia onaroka iai naba aia beeki ao aia moa.

Inanon tain te Reirei, Taabia bon te tia kamwarake naba n ana Reirei te Ekaretia Moroni High School. E kabonakoi amwarake aika a beebe ma a kamarurung, uoua te tai n te bongina, are e karoaki man te raiti ao bwain aona n aron te moa, ika ae karewe ni mangiingii ao te tomato ao n tabetai te kaabit. Ataein te Reirei a kabooi kanaia n tii \$1.30. Temwarin e karaoi ana keeke ake e korokorei ao e kabonakoi mwakorokoroia nakoia ataein te reirei.

Te riki n Toronibwai e tangira te tai ae abwabwaki ao te mwakuri korakora, ma Taabia e aki kona ni karoia n te anga riki teuana, ao e kukurei n reireiniia natina aron te ununiki. E tatangiria naba n ibuobuoki n te Ekaretia ao imwain ae e bitaki te Kooram n te Nakaoanibonga ae te Merekitereka n te maungatabu ni kabuta inanon Maati 2018, e riki bwa te kauoman ni kauntira n aia kurubu ibonga aika rietata. Temwarin e a tibwa kamotirawaaki man nakoana te



kauoman ni kauntira n ana uoote n te Bootaki n Aine—taanga aikai a ira Eita 2nd Uoote I Tarawa. ■



*Unimwaane Ulas e kamaiua te turaiwa
ao teniman batintia a bae inanon te
kaa ae e tebonako imwiin kuratina.*

Mitinare a Kamauia Aman Aomata I Kiribati

Ruu ni Kakeke Rongorongo

Uoman mitinare man Ana Ekaretia lesu Kristo ibukiia Aika a Itiaki ni Boong aika Kaitira aika a kamaiuia mwaane aika aman ake a kurati inanon te nei n aban te Betebeke i Kiribati.

Unimwaane Ulas ao Unimwaane Patane, a uaia ni beku n te Marshal islands / Kiribati mition ake a bwatika iaon te kawai ae aki bati ni kakabonganaaki iaon Tarawa ngke a noora te kaa ae bane butina ni kainetia.

A tei mitinare ao a taratara te kaa ngke e tabe n kaan, ngke e a karina naba ni mino ni kiitana te kawai, rairaki n tararake ao n toki irarikin te nei ae uakaan.

N aron are e kona n noraki n te Tamnei ae airi ma ngaia, ana tabo te bwatintia n te kaa e kuri bane n tebonako n te ran ae bokaboka.

Mitinare aika uoman a waekoa ni biri ni kaineta te kaa are e a kan iiinako ao Unimwaane Ulas e waekoa nako nanon te nei ma toana, Unimwaane Patane, e tiku ieta n tareboon ibukin te amburanti.

Teuana mataroan te kaa mai buki e uruaki ma te tekeraoi e kona ni kaukaki mataroan te kaa are mai moa ao

e a kona ni katikiia mwaane n otinako temanna imwiin temanna ni kamaiuaki mai kabin te nei.

Unimwaane Ulas, mitinare ake a beku n Ana Ekaretia lesu Kristo ibukiia Aika Itiaki ni Boong aika Kaitira, a kamauia te turaiwa ao teniman riki ana bwatintia ake mwane. N te tai are te kaaman n aomata e katikaki ni kaotinakoaki man te kaa are e tabe n iiinako, mwaane ake teniman a tia ni birinako. E ngae n anne, te turaiwa e a tia ni kamaiuaki man ikoakina ao rarabuabuana.

Waekoia ni ibuobuoki, Unimwaane Ulas e kabongana te kiraati are e uruaki n te kaa mai moa ni korea iai bain ana baeki baeki ibukin bautan ma tukan te rara ae korakora n nako.

Imwiin tabeua te aoa n tatareboon ao n tataninga n ae maan, te amburanti e a roko ma bwaai ni ibuobuoki riki ibukin bwainaoraki.

Te turaiwa are e ikoaki e karabwaiia mitinare ibukin aia mwakuri ao n ninikoria ao n kaotia ae ngaia kain Ana Ekaretia lesu Kristo ibukiia Aika Itiaki ni Boong aika Kaitira "a bon maiuakina te bwai are a kabwarabwara iaona." ■

ITERANIBA N TE TABO

Am Iteraniba n te tabo e katauraoaki irovia kaain te ekaretia n oin ami tabo iaan ana kairiiri te Beretitentii n te Aono bwa e aonga n taekinaki iai kainnanoia ao aia mwakuri kaain te ekaretia n te tabo ae ko maeka iai. Karinakin iteraniba n te tabo ni katoa baan te beeба ni kaongora e nakon tauraoin kanoana man te tabo. Ti kaoi ngkami bwa kam na tibwauai ami onimaki ni karikirakei iango ao mwakuri man kawaran am eteta n ami tabo n te:

**liahona-pacific@
churchofjesuschrist.org ■**

